



An Bhruiséil, 24 Feabhra 2022
(OR. fr)

6437/22

FISC 50
ECOFIN 156

TORADH NA nIMEACHTAÍ

ó:	Ardrúnaíocht na Comhairle
chuig:	Na Toscaireachtaí
Uimh. an doic. roimhe seo:	5724/22 FISC 22 ECOFIN 66 + COR1
Ábhar:	Conclúidí ón gComhairle maidir le liosta athbhreithnithe an Aontais de dhlínsí neamh-chomhoibríocha chun críoch cánach

Gheobhaidh na toscaireachtaí, san Iarscríbhinn a ghabhann leis seo, na conclúidí ón gComhairle maidir le liosta athbhreithnithe an Aontais de dhlínsí neamh- chomhoibríocha chun críoch cánach, a d'fhormheas an Chomhairle ag an gcrúinniú a bhí aici an 24 Feabhra 2022.

**Conclúidí ón gComhairle maidir le liosta athbhreithnithe an Aontais de dhlínsí neamh-
chomhoibríocha chun críoch cánach**

Maidir le Comhairle an Aontais Eorpaigh,

1. CUIREANN SÍ I dTREIS a thábhachtaí atá sé sásraí dea-rialachais cánach, cánachas cothrom, trédhearcacht chánach dhomhanda agus comhrac na calaoise cánach, na n-imghabhála cánach agus na seachanta cánach a chur chun cinn agus a neartú, ar leibhéal an Aontais agus ar fud an domhain araon;
2. IS MÓR AICI an comhar táirgthe leanúnach i ndáil le cúrsaí cánach idir Meitheal an Aontais um an gCód Iompair maidir le Cánachas Gnó ('an Mheitheal um an gCód Iompair') agus formhór na ndlínsí ar fud an domhain;
3. IS DÍOL SÁSAIMH DI an dul chun cinn atá déanta sna dlínsí ábhartha trí bhíthin na gcéimeanna gníomhacha a tugadh faoi na spriocdhátaí a comhaontaíodh agus na gealltanais nua a tugadh le go réiteofar na heasnaimh a shainaithin an Mheitheal um an gCód Iompair;

4. TUGANN SÍ DÁ hAIRE gníomhachtú éifeachtach na gcaidreamh uathoibríoch maidir le malartú faisnéise idir an Tuirc agus na Ballstáit uile seachas ceann amháin; MEASANN SÍ nach bhfuil an dul chun cinn atá déanta ag an Tuirc i gcomhréir go hiomlán fós leis na gealltanais a cheanglaítear faoi chonclúidí Chomhairle Ecofin an 22 Feabhra 2021 agus an 5 Deireadh Fómhair 2021; IARRANN SÍ ar an Tuirc tús a chur leis an obair theicniúil ar mhalartú éifeachtach sonraí ón Tuirc leis na Ballstáit uile, nó leanúint leis an obair sin, chun na caighdeáin idirnáisiúnta uile a comhaontaíodh a shásamh agus na ceanglais a leagtar amach sna conclúidí thuasluaite ó Chomhairle Ecofin a chomhlíonadh ina n-iomláine; ATHDHEARBHAÍONN SÍ gur coinníoll é an malartú éifeachtach uathoibríoch faisnéise leis na Ballstáit uile i gcomhréir le féilire agus caighdeáin ECFE chun go gcomhlíonfaidh an Tuirc critéar 1.1 de liosta an Aontais agus chun go gcomhlíonfaidh sí go hiomlán na ceanglais a leagtar amach sna conclúidí thuasluaite ón gComhairle; IARRANN SÍ ar an Meitheal an Chomhairle a chur ar an eolas maidir lena bhfuil ag titim amach i ndáil leis sin agus leanúint den idirphlé ar chur chun feidhme malartú éifeachtach sonraí idir an Tuirc agus gach Ballstát, agus treisiú leis an idirphlé sin, agus aghaidh a thabhairt ar na saincheisteanna atá fós gan réiteach i gcás nach ndearnadh aon dul chun cinn ina leith;
5. IS OTH LÉI go bhfuil roinnt dlínsí fós neamh-chomhoibríoch chun críocha cánach agus IARRANN SÍ ar na dlínsí sin oibriú leis an Meitheal um an gCód Iompair chun na saincheisteanna atá fós ann a réiteach;
6. FORMHEASANN SÍ an Tuarascáil ón Meitheal um an gCód Iompair a leagtar amach in 5723/22;
7. FORMHEASANN SÍ dá réir sin liosta athbhreithnithe an Aontais de dhlínsí neamh-chomhoibríocha chun críoch cánach ('liosta an Aontais') a leagtar amach in Iarscríbhinn I;

8. FORMHUINÍONN SÍ staid na himeartha mar a leagtar amach in Iarscríbhinn II í i ndáil le gealltanais a thug dlínsí comhoibríocha chun prionsabail an dea-rialachais cánach a chur chun feidhme.
-

Liosta an Aontais de dhlínsí neamh-chomhoibríocha chun críoch cánach**1. Samó Mheiriceá**

Ní chuireann Samó Mheiriceá aon mhalartú uathoibríoch faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níor gheall sé íoschaighdeáin BEPS a chur i bhfeidhm ná níor gheall sé go dtabharfaí aghaidh ar na saincheisteanna sin.

2. Fidsí

Ní comhalta í Fidsí den Fhóram Domhanda maidir le Trédhearcacht agus Malartú Faisnéise chun críoch Cánach ('an Fóram Domhanda'), níor shínigh sí ná níor dhaingnigh sí an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha aici (cuideachtaí onnmhairiúcháin, dreasacht na teicneolaíochta cumarsáide ioncaim, ráta lamháltais cánach do cheanncheathrú réigiúnach nó domhanda), níl sí ina comhalta den Chreat Cuimsitheach um Chreimeadh an Bhoinn agus Aistriú Brabúis ná níor chuir sí íoschaighdeáin ECFE frith-BEPS i bhfeidhm agus níl na saincheisteanna sin réitithe go fóill aici.

3. Guam

Ní chuireann Guam aon mhalartú uathoibríoch faisnéise airgeadais i bhfeidhm, níor shínigh sé ná níor dhaingnigh sé, lena n-áirítear tríd an dlínse a bhfuil sé ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, níor gheall sé íoschaighdeáin BEPS a chur i bhfeidhm ná níor gheall sé go dtabharfaí aghaidh ar na saincheisteanna sin.

4. Oileáin Palau

Ní chuireann Oileáin Palau aon mhalartú uathoibríoch faisnéise airgeadais i bhfeidhm, níor shínigh siad ná níor dhaingnigh siad an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, agus níl na saincheisteanna sin réitithe go fóill acu.

5. Panama

Níl rátáil ‘mórchomhlíontach’ ar a laghad ag Panama ón bhFóram Domhanda maidir le Trédhearcacht agus Malartú Faisnéise chun críoch Cánach chun Faisnéis a Mhalartú arna Iarraidh sin agus níl an tsaincheist sin réitithe go fóill aige. Tá córas díolúine maidir le hioncaim ó fhoinsí eachtracha díobhálach ag Panama agus níl an tsaincheist sin réitithe go fóill aige.

Gheall Panama aghaidh a thabhairt ar mholtaí Chreat Cuimsitheach um BEPS i ndáil le cur chun feidhme chritéar 3.2 maidir le tuairisciú de réir tíre (CbCR), in am trátha, ionas go léireofar é sin i dTuarascáil Athbhreithnithe Piaráí ar Ghníomh 13 Chreat Cuimsitheach um BEPS i bhfómhar na bliana 2023.

6. Samó

Tá córas cánach fabhrach díobhálach ag Samó (gnó eischósta) agus níl an tsaincheist sin réitithe go fóill aige.

7. Oileán na Tríonóide agus Tobága

Ní chuireann Oileán na Tríonóide agus Tobága aon mhalartú uathoibríoch faisnéise airgeadais i bhfeidhm, níl rátáil ‘mórchomhlíontach’ ar a laghad acu ón bhFóram Domhanda maidir le Trédhearcacht agus Malartú Faisnéise chun críoch Cánach chun Faisnéis a Mhalartú arna Iarraidh sin, níor shínigh siad ná níor dhaingnigh siad an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha acu (criosanna saorthrádála), agus níl na saincheistean sin réitithe go fóill acu.

Gheall Oileán na Tríonóide agus Tobága aghaidh a thabhairt ar mholtaí Chreat Cuimsitheach um BEPS i ndáil le cur chun feidhme chritéar 3.2 maidir le tuairisciú de réir tíre (CbCR), in am trátha, ionas go léireofar é sin i dTuarascáil Athbhreithnithe Piaráí ar Ghníomh 13 Chreat Cuimsitheach um BEPS i bhfómhar na bliana 2023.

8. Ógh-Oileáin na Stát Aontaithe

Ní chuireann Ógh-Oileáin na Stát Aontaithe aon mhalartú uathoibríoch faisnéise airgeadais i bhfeidhm, níor shínigh siad ná níor dhaingnigh siad, lena n-áirítear tríd an dlínse a bhfuil siad ag brath uirthi, an Coinbhinsiún Iltaobhach ECFE maidir le Cúnamh Riaracháin Frithpháirteach arna leasú, tá córais chánach fhabhracha dhíobhálacha acu (clár forbartha eacnamaíche, cuideachtaí díolmhaithe, gníomh rialála ionaid baincéireachta idirnáisiúnta), níor gheall siad íoschaighdeáin BEPS a chur i bhfeidhm ná níor gheall siad go dtabharfaí aghaidh ar na saincheistanna sin.

9. Vanuatú

Éascaíonn Vanuatú struchtúir agus socruithe amach ón gcósta arb é is aidhm dóibh brabúis nach bhfuil aon fhíorshubstaint eacnamaíoch ag baint leo a mhealladh, agus níl an tsaincheist sin réitithe go fóill aige.

Tá Vanuatú ag fanacht le hathbhreithniú forlíontach ag an bhFóram Domhanda maidir le Malartú Faisnéise arna Iarraidh sin.

Staid na himeartha maidir leis an gcomhar leis an Aontas i ndáil le gealltanais a thug dlínsí comhoibríocha chun prionsabail an dea-rialachais cánach a chur chun feidhme

1. Trédhearcacht

1.1. *Gealltanais an malartú uathoibríoch faisnéise a chur chun feidhme, trí Chomhaontú Iltaobhach na nÚdarás Inniúil a shíniú nó trí chomhaontuithe déthaobhacha*

Meastar go ndéanfaidh an dlínse seo a leanas faisnéis a mhalartú go huathoibríoch leis na 27 mBallstát uile de réir na hamlíne dá dtagraítear i mír 6 de Chonclúidí ón gComhairle an 22 Feabhra 2021, mír 4 de Chonclúidí ón gComhairle an 5 Deireadh Fómhair 2021 agus mír 4 de Chonclúidí ón gComhairle an 24 Feabhra 2022.

An Tuirc

1.2. *Comhaltas san Fhóram Domhanda maidir le Trédhearcacht agus Malartú Faisnéise chun críoch Cánach ('an Fóram Domhanda') agus rátáil shásúil i ndáil le malartú faisnéise arna iarraidh sin*

Tá na dlínsí seo a leanas ag fanacht ar athbhreithniú forlíontach ón bhFóram Domhanda:

Anguilla, Barbados, an Bhotsuáin, Doiminice, na Séiséil, an Tuirc

2. Cánachas Cothrom

2.1. *Córais chánach dhíobhálacha atá ann*

Thug na dlínsí seo a leanas gealltanais a gcórais díolúine ioncaim foinse eachtraí dhíobhálacha a leasú nó a dhíothú faoin 31 Nollaig 2022:

Cósta Ríce, Hong Cong, an Mhalaeisia, Catar, Uragua

Thug na dlínsí seo a leanas gealltanais a gcórais chánach fhabhracha dhíobhálacha a leasú nó a dhíothú faoi raon feidhme an Fhórait maidir le Cleachtais Chánach Dhíobhálacha faoin 31 Nollaig 2022:

Cósta Ríce (crios saorthrádála, córas díolúine maidir le hioncam ó fhoinsí eachtrach), Iamáice (criosanna speisialta eacnamaíoch), an Iordáin (crios eacnamaíoch speisialta Aqaba), an Mhacadóin Thuaidh (crios forbartha tionsclaíche teicneolaíche)

Gheall an dlínse seo a leanas córas fabhrach cánach a leasú faoin 31 Nollaig 2022:

Cónaidhm na Rúise (cuideachtaí sealbhaíochta idirnáisiúnta)

2.2. *Córais chánach a bheith ann lena n-éascaítear struchtúir eischósta a mheallann brabúis gan fíorghníomhaíocht eacnamaíoch*

Gheall na dlínsí seo a leanas aghaidh a thabhairt ar na moltaí ón bhFóram maidir le Cleachtais Chánach Dhíobhálacha i ndáil le cur chun feidhme éifeachtach na gceanglas ó thaobh substainte de faoi chritéar 2.2 in am trátha ionas go mbeidh an fóram in ann a chinneadh ag an chéad chruinniú eile a bheidh aige in 2022 gur tugadh aghaidh ar an moladh/ar na moltaí:

Anguilla, na Bahámaí, Barbadós, Beirmiúda, Oileáin na dTurcach agus Caicos

3. Creimeadh an bhoinn chánach agus aistriú brabúis a chosc

3.2. *Cur chur chun feidhme íoschaighdeán an Tuairiscithe de réir Tíre (CbCR)* *(Gníomhaíocht BEPS 13)*

Gheall na dlínsí seo a leanas íoschaighdeán CbCR a chur chun feidhme trí aghaidh a thabhairt ar mholtaí Chreat Cuimsitheach um BEPS in am trátha, ionas go léireofar é sin i dTuarascáil Athbhreithnithe Piaráí ar Ghníomh 13 an Chreata Chuimsithigh i bhfómhar na bliana 2023 agus/nó caidreamh malartaithe maidir le CbCR le Ballstáit uile an Aontais a ghníomhachtú de réir an spriocdháta a comhaontaíodh:

Na Bahámaí, Barbadós, an Bheilís, Oileáin Bhriotanacha na Maighdean, Iosrael, Monserrat, An Téalainn, An Túinéis, Vítneam
